

اللى يعيش ياما يشوف

قالوا اللى يعيش ياما يشوف

واللى يمشى يشوف أكثر

أعمل ف نفسك معروف

أوعى دمك يتعكر

دى الصحة نعمة ما تتقدر

من غيرها العيشة تتكدر

أوعى تتأثر بظروف ولا من كلمة

تزعل وتفكر

اللى متميز معروف

حسادة دايمًا تكثر

ف الدنيا ياما ح تشوف
أيام مرة وأيام أحلى م السكر
أعمل الخير وانساه
مش لازم بالخير تتمنظر
أوعى بكلام الناس تتأثر
وتخلي قلبك يتحجر
وف المعروف اعمل أكثر
آملا حياتك حب وخير
وبلاش تتعشم ف الغير
دا العشم ف الله أكبر
وكلامك أفهم معناه قبل م تقوله
ما تفكر
وإياك عل أهلك تتكبر

واللى يبيعك لازم تنساه
ولاتندم ولا تتحسر
اللى عدا ماضى وفات
أهتم بالحاضر أكثر
كل اتنين بعده ثلاث
والأفراح حواليك راح تكثر
والحب ف يوم راح تلقاه
وكله بأوانه متقدر
حتى لو غاب استناه
يمكن جاى على مهله بيتمخطر
سيب الماضى وانسى آساه
خد منه خبرة مش أكثر
عيش الفرح وشارك فيه
أيامك ح تنور بيه

أتفائل دايمًا بالخير
غنى وافرح زى الطير
خلى توكانك على مولاك
أفهم حكمة ربك .. فكر
دا اللى يعيش يما ح يشوف
واللى بيمشى ح يشوف أكثر